

## ISCARTA NAJ SANTIAGO

*Yichebanil iscarta naj Santiago*

<sup>1</sup> Hanin Santiago inti'an, ischejab Comam Dios yeb Comam Jesucristo wehan. Chiwaltojan teyet chewil heba yiñ hecawil, hex cablahoñeb ma-jan wet coñob Israel, hex pujanexto yul sat yibañk'inal ti'.

*Hune' helanile chak' Comam Dios*

<sup>2</sup> Hex wuxtaj, hex wanab, hayet chihul sunil ilwebal teyibañ, caw ak'we tzalaho hec'ul sic'lebil.

<sup>3</sup> Heyohtaj ta hayet chul ilwebal teyibañ yu yil-laxi ta ayco Comam Dios yipo heyanma, hac tu' chu hecuyni istecha ilwebal heyu. <sup>4</sup> Yilal helahnico heyak'ni heyanma istecha heyu, hac tu' chu hech'ib yiñ yet Comam Dios, yeb xin tz'ajan che-xelcanico yiñ isc'ulal Comam, hac tu' xin matxa nich'ano tzet mach tz'ajanojex yiñ yet Comam.

<sup>5</sup> Tato ay hunujex maxtó tz'ajano hehelanil, k'anwe tet Comam Dios, cat yak'ni Comam teyet, yuto mach chismale Comam yak'ni tet macta chik'anni. Chak' Comam tet, yaj mach chalico Comam yiñ sat mac bay chak' Comam hune' tu'. <sup>6</sup> Hayet chicok'anni cohelanil tet Comam, cok'anawe yiñ sunil janma. Machojab chicabcon janma, yuto ha' mac chicabcon yanma, lahan haca' ha' mar ch'ec' jobla yu jak'ek'; nanantaxañe bay chitocanicoj. <sup>7</sup> Ha' mac hac tu' yecoj, tajca ch'ec' yiñ isnabal ta ay tzet chischah tet Comam Dios Jahawil. <sup>8</sup> Yuto nan ch'ec' yiñ isnabal tinañ,

nanxapaxo ch'ec' yiñ isnabal hecal, hac tu' xin mach t'iñano yeco yiñ isbeybal.

<sup>9</sup> Tato ay hunu juxtaj maca hunu janab ya'ta yehi, yilal yak'ni tzalaho yanma yiñ Comam, yuto ay yelapno ye yul sat Comam Dios. <sup>10</sup> Hacpax tu' ebnaj juxta yeb ebix janab k'alom, tzalahojabo yet chiilaxayo yu Comam Dios, yuto ha' mac k'alom lahan haca' isxumaquil te' telaj machi nahatli. <sup>11</sup> Yuto hayet chi'ahilo tz'ayic cat ispohcañ yip k'a', chitajilo te' telaj, cat yay hona isxumaquil te', hac tu' xin matxa c'ulch'ano jilni te'. Haca' ishowayo isxumaquil te' telaj tu', hac tu' isc'ayayo ebnaj k'alom yet chiscutxban ebnaj isk'alomal yul sat yibañk'in al ti'.

### *Ilwebalyebej isya'tajil*

<sup>12</sup> Sak'al yet mac chitecha ilwebal yu, yuto hayet chilahwi istecha ilwebal yu hune' mac tu', chak' Comam hune' ispaj selel tet, ha' ton hune' isk'inal mach istañbal, ha' ton hune' corona haltebil yu Comam tet mac chitzala yiñ Comam. <sup>13</sup> Hayet chorimontelax cowatx'en hunu istx'ojal, machojab chijala ta ha' Comam Dios chorimonten cowatx'en hune' tu', yuto Comam mach chu corismonten cowatx'en hunu istx'ojal, machipaxo tzet chimonten Comam yu yanico ismul. <sup>14</sup> Wal xin, ha' istx'ojal ayco jiñ ha' chorimonteni, cat coñyinito yiñ istx'ojal. <sup>15</sup> Ta chijaco janma yiñ istx'ojal aytic'aco jiñ, yiñ chipitz'ati comul. Haxa yet chich'ib hune' istx'ojal yul janma tu', cat yul hune' camical jiñ.

<sup>16</sup> Wuxtaj wanab, hex caw xahan ay wuhan, mach cheyak' subchaho heba. <sup>17</sup> Sunil tzet c'ul

yeb sunil tzet tz'ajan yehi tet Comam Dios chicochah. Ha' Comam watx'erie sunil tzet chimujli yul satcañ. Ha' huntek'an tu' xin chishel isba, wal Comam Dios, hune'netic'a ha' Comam. <sup>18</sup> Yuto el yiñ isc'ul Comam yak'ni cok'inal mach istañbal yu Istzoti' caw yeli, hune' yak' jet yet cochahni yul janma. Yu hune' tu' xin, hañorñ caw babeloñ sata sunil tzet watx'ebil yu Comam Dios.

*Yilal coyijen tzet chal Istzoti' Comam Dios*

<sup>19</sup> Wuxtaj wanab, hex xahan ay wuhan, naweti huntek'an chiwalti'an. Hajbawe hetxiquin heyaben; mach comono cheyal hunu tzet ye tu' yiñ aña, mach comono chitit hehowal. <sup>20</sup> Yuto yet chitit cohowal, maxtaj tzet choche Comam chicowatx'e. <sup>21</sup> Yuxin bejwecano sunil istx'ojal yeb sunil ismachiswalilal caw chipoh yul yibarik'in al ti!. C'ulch'anojab chu hechahni Istzoti' Comam Dios challax teyet, hune' tz'unbilxa yul heyanma yu Comam, yuto ha' chexcolni tet sunil istx'ojal.

<sup>22</sup> Machojab torie chijabe Istzoti' Comam, wal xin yilal coyijeni. Yaj tato torie chijabe tzet chala, mach chicoyijepaxoj, hañ-caw-oñ chijak' subchaho coba. <sup>23</sup> Ha' mac chi'aben Istzoti' Comam Dios, mach chiswatx'epaxo tzet chala, lahan haca' hunu mac chiyil sat yul ch'en espejo, <sup>24</sup> yaja' lahwi yilni sat tu', caw yiñ aña chito nahul yu tzet yillax sat. <sup>25</sup> Wal mac mach chito nahul Istzoti' Comam Dios yu, to caw chaco yiñ isc'ul yiñ hune' tzet chabe tu' cat isyijeni, caw sak'al yet; ha' Istzoti' Comam tu' choñbejtzonilo yul isk'ab ismachiswalilal.

<sup>26</sup> Ta ay hunu mac yijem yiñ tzet chal Comam Dios yalni, yaj ta mach chak' cacha' isti' yiñ istx'ojal, ha'hune' anma tu' chiyak' subchaho isba ischuquil. Hac tu' xin nabañe chala tato yijem yiñ tzet chal Comam Dios. <sup>27</sup> Yaj ta choñcolwa yiñ niñte unin mach ismam, mach ismi', yeb yiñ ebix camnaxa yichamil, cat xin copohnilo coba yiñ istx'ojal yul sat yibañk'in al ti', wal tu' caw lañan coyijen tzet chal Comam Dios Mame.

## 2

### *Lahanñehojab coxahanñien anma*

<sup>1</sup> Hex wuxtaj, hex wanab, hex xahechah Comam Jesucristo yul heyanma, Comam caw ay yelapno yehi, lahanñehojab hexahanñien heba hesunil. <sup>2</sup> K'inalo ta cutxanexicoj cat yapni hunu naj k'alom, caw c'ul yehico xil isk'ap yeb xin ayco hunu isjolk'ab naba oro. Caw xin c'ul chu hechahni naj, cat heyalni tet naj: "Tz'orñañ yibañ hune' xila caw c'ul ti'", ta quexchi. Lahwi tu' xin cat yocpaxapno hunu naj caw meba', caw xilxa xil isk'ap aycoj, cat xin heyalni tet naj: <sup>3</sup> "Wal halirñi bey tu'", maca "Ayañ tz'orño sat tx'otx'", ta quexchi. <sup>4</sup> Ta hac tu' cheyute, mach lahano chexahanñie ebnaj juxtaj yeb ebix janab. Ha' xin chalniloj ta tx'oj chenaco yiñ heyet anmahil.

<sup>5</sup> Hex wuxtaj, hex wanab, txumweloj tato ha' Comam Dios sic'nicañ anma meba' ay yul sat yibañk'in al ti' yu yak'ni Comam isk'alomal tet yiñ yanayto yul yanma yiñ Comam, cat ischahnipaxo yehobal bay ch'oc Comam Yahawil, hune' yalte Comam tet mac ch'ocheni. <sup>6</sup> Walexpaxo

xin cheyah ebnaj meba', machi yelapno ebnaj yul hesat. ¿Mac anmahil chexetani, cat quexyinito sata naj alcal? Ha' ton ebnaj k'alom. <sup>7</sup> ¿Tom mach heyohtajoj tato ha' ebnaj tu' tx'oj istzotel yiñ Comam Jesucristo ayxaco yul janma?

<sup>8</sup> Ta caw yeli cheyije isley Comam Dios haca' yalni Yum Comam bay chala: "Xahan cheyil heyet anmahil haca' heya'ilñen heba," xicanoj. Ta hac tu' cheyute caw c'ul heyecoj. <sup>9</sup> Yaj ta mach lahano chexahanñe heba, cheyaco hemul, cat hecanpaxcano tx'ojal tet isley Comam Dios.

<sup>10</sup> Ta chijala ta sunil ley chicoyije, yaja' ta ay hunuxa chejbanile mach chicoyije, chijaco comul yiñ sunil ley haca' tu'. <sup>11</sup> Yuto ha'tic'a Comam Dios halni: "Mach chexixli, mach chexpotx'wipaxo camo anma," xi Comam. Yuxin ta ay mac mach chiec' ixloj, yaja' ta chispotx' camo yet anmahil, chiyaco ismul tet ley haca' tu'.

<sup>12</sup> Yuxin nanñe heyu yiñ tzet cheyala', yeb yiñ tzet chewatx'e, yuto yilal yixtañwiti yu hune' ley yet Comam Jesucristo. Hune' ley xacoñbejtzonico yiñ cowatx'en tzet choche Comam Dios. <sup>13</sup> Ta mach chitz'ay coc'ul yiñ jet anmahil, mach chitz'aypaxo isc'ul Comam jiñ yiñ hune' tz'ayic yet chiyilni Comam Dios yiñ tzet chielico anma. Yaj tato chitz'ay coc'ul yiñ jet anmahil, chitz'aypaxo isc'ul Comam jiñ.

### *Mach toñeojab chorñtzoteli yilal cowatx'en tzet chijala*

<sup>14</sup> Hex wuxtaj, hex wanab, tzet chaliloj ta ay mac ayco yanma yiñ Comam yalni, yaj ta machi nich'ano isc'ulal tzet chiswatx'e, ¿tom xin

chicolchahi yu ayxa yanma yiñ Comam yalni? ¡Machoj! <sup>15</sup> K'inalo ta ay hunu juxtaj maca hunu janab machi xil isk'ap, maca matzet chislo, <sup>16</sup> cat heyalni tet: “Chawil haba, c'ul chawute hak'uxni haba, wa'an yiñ caw c'ul,” ta quexchi. Matzet xin cheyak'paxo tet, ¿tzet taxca chalilo hune' tu'?

<sup>17</sup> Yuxin ta ayex cheyala ta ayco heyanma yiñ Comam, machi xin chewatx'e isc'ulal, nabñe cheyala ta ayco heyanma yiñ Comam Dios. Ha' xin chalniloj ta camomex yul sat Comam.

<sup>18</sup> K'inalo ta ay hunu mac chihalni: “Ayco wanmahan yiñ Comam.” Haxa hunxa mac xin chalpaxoj: “Isc'ulalñe chinwatx'e'an.” Chiwalan teyet, mach ayoco Comam Dios yipo heyanma ta mach chewatx'e isc'ulal. Wal xin chinyehan teyet ta ayco Comam Dios yipo wanmahan yu chinwatx'ehan isc'ulal.

<sup>19</sup> Hex ti', cheyayto yul heyanma tato hune'ñech'an Comam Dios. Caw c'ul hune' tu', yaj maxñetaj hune' tu' yilal yehi. Hacpax tu' ebnaj ischejab naj matzwalil, yohta ebnaj tato hune'ñech'an Comam Dios. Caw xin chiluyluncañ ebnaj xiwquilal yet chisnaniti ebnaj Comam. <sup>20</sup> ¡Tzet hesucal! Cheyala ta ayco heyanma yiñ Comam, machi xin chebeybalñe tzet choche Comam. Ha' xin chalniloj ta machi heyanma yiñ Comam.

<sup>21</sup> Naweti yiñ jichmam Abraham; isyije icham yinito isc'ahol yiñ xahanbalil. Yu tzet iswatx'e icham tu', yuxin occano icham c'ulal yul sat Comam Dios. <sup>22</sup> Hac tu' xin chu johtañeniloj ta yaco yanma icham Abraham yiñ Comam Dios, yuto isyije icham tzet ak'lax iswatx'e, hac tu' xin yu

isyenicanilo isba ta ayco yanma icham yiñ Comam Dios. <sup>23</sup> Hac tu' yu yijni isba yiñ tzet halbilcano yul Yum Comam Dios bay chala: "Caw yaco yanma icham Abraham yiñ tzet yal Comam Dios, yu hune' tu' xin cancano icham c'ulal yul sat Comam," xícanoj. Yuxin yacanico Comam icham Abraham tu' yamigohoj. <sup>24</sup> Yuxin nachaojabilo heyu tato choñcancano c'ulal yul sat Comam Dios yu tzet chicowatx'e, maññetaj yu janico janma yiñ.

<sup>25</sup> Hac tu' yupaxo hune' ix ix tx'oje iswi', Rahab isbi. Cancano ix c'ulal yul sat Comam Dios yu yak' ix bay way ebnaj ischejab Comam, yeb xin nanxa behal bay ischejto ix ebnaj yurie mach chitzabcha ebnaj. <sup>26</sup> Haca' hunu nimanile matxa yanma ayictoj, camomxa, hac tu' ye hunu mac chihalni ta ayco yanma yiñ Comam Dios, mach chisyijepaxo tzet chal Comam, nabañe hune' tu'.

## 3

### *Ismuljak'*

<sup>1</sup> Hex wuxtaj, hex wanab, mach comono cheyocheco heyoc tuyawomal, yuto heyohtaj ta hanorí chorícuwahi caw ec'balto chiilax yiñ tzet chicowatx'e. <sup>2</sup> Cosunil ayto niñtexa cotx'ojal yiñ tzet chicowatx'e, yaja' ta ay mac mach ch'aycay yiñ istzoteli, ha' hune' mac tu' caw c'ul, yuto chupaxo isk'oji iscachni sunil isnimanil yiñej istx'ojal.

<sup>3</sup> Chijacto ch'en freno yul isti' no' cheh yurie isyijen no' tzet chijoche. Hac tu' xin sunil isnimanil no' chito bay chal coc'ul. <sup>4</sup> Hactic'apax tu' te' barco caw nimej te' yaj waxańca chul tiňna jak'ek' yiñ te' yaj hańech'an nich'an timón chisbak'o naj piloto

ha' bay chisyije te', cat isto te' bay chal isc'ul naj.

<sup>5</sup> Hac tu' ye nich'an jak' ti', caw nich'anch'an yaj caw cañye sic'lebil, haca' hunu nich'an tz'it k'a' chu isriusnilo huno niman k'eptalaj. <sup>6</sup> Hac tu' ye jak' ti', lahan yeb k'a k'a', mach isbi hanta istx'ojal ayco yiñ; yetbi conimanil yehi yuxin sunil conimanil chu yetaxto yu. Hune' k'a k'a' tu', haca'tic'a yul hune' niman k'a' mach istañbal chitit isk'ak'al, hac tu' xin chu yetaxcanto sunil cobeybal.

<sup>7</sup> Hañori anma hoñ ti' chorik'oji cocuyni sunilej no' xol telajil nok'; no' ch'ic, no' laba yebej no nok' ay xol ha' mar. <sup>8</sup> Yaja' wal jak' ti' xin, mach chorik'oji cocuyni. Lahan yeb huno istx'ojal mach chak' cacha' isba, lahan haca' veneno choñak'ni camoj. <sup>9</sup> Ha'tic'a jak' ti' xin, chalni c'ulla tzoti' yiñ Comam Dios Mame, ha'tic'a xin chihalni tzoti' tx'oj yiñ jet anmahil watx'ebil yu Comam Dios. Ha' anma tu' xin, yechel Comam yehi. <sup>10</sup> Yul coti' ch'elti tzoti' c'ul, yultic'apaxo coti', ch'elpaxti tzoti' tx'oj. Wal xin wuxtaj, wanab, mach cheyute heba haca' tu'. <sup>11</sup> Haca' hunu isnuk' ha ha' tinañ, mach chiahilo ha ha' chi' yeb xin ha ha' c'ah. <sup>12</sup> Hacpax tu' hunu yoj te' higo, mach chu yak'ni te' sat te' aceituna, yeb hunu yoj te' uva mach chu yak'ni te' sat te' higo. Hac tu' ye isnuk' hunu ha ha', mach chu yahilo ha ha' chi' yeb xin ha' c'achi'.

### *Cohelanil chitit tet Comam Dios*

<sup>13</sup> Ta ay hunu mac texol caw ay isnabal yeb xin caw ay ishelanil, isyebabilo yiñ isc'ulal chiswatx'e, yik'abayo isba yu hune' ishelanil tu'. <sup>14</sup> Yaj ta ayñetic'aco chichonc'ulal caw c'ah yul heyanma, yeb xin chewatx'e istx'ojal yiñ heyet

anmahil, cat xin heyalnipaxo heba c'ulal, wal xin caw lek'ti' hex. <sup>15</sup> Matxa taj tet Comam Dios chtit hune' yitz'atil wi'e tu', to yetxa sat yibañk'inal ti' yehi, yetxa anma ye hune' yitz'atil hewi' tu', yiñ naj matzwalil chitita. <sup>16</sup> Ta aytoco chichonc'ulal jiñ, yeb xin ta hanorñe chijoche ch'oc cowinajil, ta hac tu' mach lañano cobelwi yiñ istxolal, caw xin ayto sunil istx'ojal jiñ.

<sup>17</sup> Ta tet Comam Dios chtit cohelanil, matxa choñec' yiñ istx'ojal, wal xin choñec' yiñ ak'anc'ulal. C'ulch'an chijute coc'ul, cat istz'ay coc'ul yiñ jet anmahil, lahanpaxo jet anmahil yul cosat, yeb xin ist'iñanilñetic'a chijala. <sup>18</sup> Ta ak'anc'ulal chicowatx'e, chicochah ispaj, ha' ton istoholal.

## 4

### *Mach chu heyetbirñen heba yeb istx'ojal*

<sup>1</sup> ¿Bay chititico nimeta howal yeb xin niñte howal texol? Wal xin yu huntek'an istx'ojal chimunla yul heyanca yuxin cheyak'le howal.

<sup>2</sup> Hex ti' tzijxarñe tzet ye tu' cheyochechoj, yaj mach chexk'oji yiñ, yu hune' tu' xin chiec' yul hewi' hepatx'wahi, yeb xin chichiwaco hec'ul yiñ mac ay tzet aya. Yu mach chu yoc heyetoj, yuxin ch'ah howal texol. Wal xin mach ch'ak'lax teyet tzet cheyoche tu' yu mach chek'an tet Comam Dios.

<sup>3</sup> Waxañca chek'ana, yaj mach ch'ak'lax teyet yuto mach c'ulo chu hek'anni, yuto yu heyetanto yiñ istx'ojal cheyoche.

<sup>4</sup> Hex ti', caw mach yijemojex, yuto caw cheyoche to heyoc hewatx'en tzet ye tu' tx'oj ay yul sat yibañk'inal ti!. Yu hune' tu' xin, chexocceno howal

yin Comam Dios. <sup>5</sup> Tajca ch'ec' yin henabal tato machi nich'ano tzet yelapno ye Istzoti' Comam Dios tz'ibñebilcano yul Hum, bay chala: "Ha' Comam Dios añecanico Comam Espíritu Santo jin, Comam Espíritu tu' xahan ayori yu, yuxin choche Comam ta hañe Comam chicoxahanñe,"\* xiayoj. <sup>6</sup> Yu isc'ulch'anil isc'ul Comam, yuxin chicolwa Comam jin. Chalnipaxo yul Yum Comam haca' ti': "Chitit ishowal Comam yin anma caw lek'ti' chute isba. Walpaxo mac chiyo isba xin, caw chitzala Comam Dios yin,"\* xiayoj.

<sup>7</sup> Yuxin yijemojab chijute coba tet Comam Dios, cat copahnito naj matzwalil, hac tu' xin ch'elcañ naj jet. <sup>8</sup> Hitzojoñweco isc'atañ Comam Dios, hax-inwal chihitzico Comam coc'atañ. Hex mulum, tacojab hec'ul teyiñ yu istx'ojal chewatx'e, yuto caw yilal hesajñen heyanma yul sat Comam Dios. Haca' hex chito heyocheto yet yul sat yibañk'in al ti', cat hexahanñenpaxo Comam heyalni. <sup>9</sup> Ocojab bisc'ulal yin heyanma, tacojab hec'ul yet chenani-tij. Ok'añwe sic'lebil yu hemul hex caw xaque-xtzebi yu heyochen istx'ojal. Ocañwe yin ok'il hex caw chextzala sic'lebil yin tzet chak' hune' yul sat yibañk'in al ti', meltzañweco yin bisc'ulal. <sup>10</sup> Iweyo heba tet Comam Dios, hac tu' xin chexi-laxcarñ yu Comam.

### *Machojab cheyalle hek'umal*

<sup>11</sup> Hex wuxtaj, hex wanab, mach cheyalle hek'umal hunujex, yuto ta ay mac chihalni isk'umal yuxtaj maca yanab, lañan yalni isk'umal

---

\* **4:5** Ex 20:5; Dt 4:24    \* **4:6** Pr 3:34; 1Pe 5:5

chejbanile yet Comam Dios. Maca ta cheyala ta mach c'ulo yeco hunu heyuxtaj maca heyanab, lañan heyalni tato chejbanile yet Comam mach c'uloj. Hac tu' xin lañan heyanico heba juezal yin chejbanile yet Comam tu', mach xin lañano heyijeni. <sup>12</sup> Ha' hune' mac ak'ne chejbanile tu', ha'tic'a xin ayco juezal. Ha' xin chu yak'ni colbanile yeb xin chu coñyanico yin isya'tajil. Wal hunujon xin machi yu joc jilno tzet chielico hunu juxtaj maca janab, yuto hañc'añe Comam Dios chu yilni tzet chielicoj.

### *Mach johtajo tzet jeco hecal cabe*

<sup>13</sup> Abewecanojex cheyal haca' ti': "Yet hecal maca yet cabe choñto munil yul hune' niman coñob yin hunu habil. Ha' bey tu' xin chijaco hunu niman cotxoñ, hac tu' xin caw niman comelyu chicocutxba," quexchi. <sup>14</sup> Yaja' mach heyohta tzet heyeco yet hecal maca cabe. Sak'al heyalni, yaja' cocawil yul sat yibañk'inal ti', lahan yeb niñte moyan, toñe chisye isba hunep cat isc'aycañ. <sup>15</sup> Ha' hune' wal heyalni: "Ta chiel yin isc'ul Comam Dios Jahawil, ayñetic'a cocawil, chicowatx'e hune' ti' maca hune'xa tu'," ha' hune' tu' wal heyalni. <sup>16</sup> Yaja' hex ti', mach haco tu' heyalni, to ha' hune' cheyala: "Chicowatx'e hune' ti', cat cowatx'en hune'xa tu'," quexchi yul heyet hechuquil. Ha' xin chalniloj ta mach cheyiyo heba tet Comam Dios. Caw xin tx'oj hune' tu' yul sat Comam.

<sup>17</sup> Ta johtaj ta c'ul cowatx'en hunu tzet ye tu', tzujan tu' xin mach chicowatx'epaxoj, chijaco comul yul sat Comam Dios.

## 5

*Tzet ch'elico ebnaj k'alom*

<sup>1</sup> Hex k'alom hex ti', abewecanoj. ¡Ok'ařiwe yiň caw ip teyiň yuto lařan yul istiempohal bay ch'ec'oya' heyanma! <sup>2</sup> Sunil hek'alomal lařan isk'atoj yeb xin xil hek'ap holquiřtaxarë yu no' ih. <sup>3</sup> Sunil hemelyu tenbabiličato tu' xin, ayxa isk'uxewal ch'en, ha' chiřuswaho teyiň yul sat Comam Dios cat quexistarřzeniloj, haca' istz'ato hunu tzet ye tu' yul k'a'. Ha' hek'alomal tenbabilič heyu tu', ha' ch'oco ak'oc'ule teyiň yiň islahobal tz'ayic. <sup>4</sup> Hanta istohol ebnaj hemunlawom mach heyak' yiň hemunil. Ha' hune' tu' xin chitit istz'acti'al teyibari, yuto xayabe Comam Dios yel yaw ebnaj munlawom tu', Comam yahawil yiň ebnaj ángel ay satcaň.

<sup>5</sup> Hex k'alomex ti', caw xaheyak' yoche heyanma yul sat yibařk'inal ti', yiň sunil tzet cheyoche, yuxin caw bak'ichexxa. Haca' no' wacax caw bak'ich, lařanxa yapni istiempohal ispotx'laxi. <sup>6</sup> Hex k'alomex ti' checawxece ismul anma yibaři, huntek'an isc'ulalře chiswatx'e. Cheyak'nipaxo camo ebnaj yu mach chu iscolní isba ebnaj teyet.

*Nimanojab cheyute hec'ul masanta yet chul Comam Jesucristo*

<sup>7</sup> Hex wuřtaj, hex wanab, niman cheyute hec'ul masanto yet chul Comam Jesucristo, haca' chu hunu naj munlawom niman isc'ul naj yechman yoc ha' řab. Nimanpaxo chute isc'ul naj yechman yelilo sat istz'unub. <sup>8</sup> Hacojab tu' cheyute,

nimanojab cheyute hec'ul. Linibawe heba yiñ Comam, yuto toxá chul Comam.

<sup>9</sup> Wuxtaj, wanab, mach chexoc ak'oc'ule teyiñ hununex, haxinwal yet ch'apni istz'ayical yillaxi tzet chexelicoj, mach hemul ch'ilcha yu Comam. Yuto ha' Comam alcal yecoj, cawilxa yeti Comam.

<sup>10</sup> Wuxtaj, wanab ha' ebnaj ischejab Comam Dios halni Istzotí' Comam yet payat techá yu ebnaj yiñlen isya'tajil, caw aypaxo isnimanil isc'ul ebnaj; yuxin techahojab heyu haca' yak'le ebnaj tu'.

<sup>11</sup> Ha' mac ay isnimanil isc'ul istecha isya'tajil yu, caw sak'al yet yul cosatañ. Hex ti' xaheyabe yiñ tzet yu istecha isya'tajil yu naj Job, heyabenpaxoj tzet yu iscolwa Comam Dios yiñ naj yet tzujanxa, yuto caw c'ul Comam Dios yeb xin chitz'ay isc'ul Comam yiñ anma.

<sup>12</sup> Wal xin hex wuxtaj hex wanab, ay hune' caw yilal yehi, ta ay tzet choche hec'ul cheyala mach cheyak' binaho satcañ maca tx'o tx'otx' maca hunuxa tzet ye tu' yak'ni isba yiñ tzet cheyala. Hayet cheyalni *ho'* yelojab cheyala. Hayet cheyalni *machojo*, machojabí; haxinwal mach chexyato Comam yiñ isya'tajil.

<sup>13</sup> Ta ay hunujex bisc'ulal heyehi, ocañwe tx-ahloj. Taca tzalahilal heye xin, bitñewe Comam Dios. <sup>14</sup> Ta ay mac ya'ay, yawtehab ebnaj anciano yet iglesia. Haxa ebnaj anciano tu' xin, chitxahli yiñ, cat ismasnico ebnaj aceite yiñ mac ya'ay tu' yiñ isbi Comam Jesucristo Jahawil. <sup>15</sup> Hayet chex-txahli yiñ sunil heyanma xin, chicawxicarí hune' mac ya'ay tu'. Ta ay ismul hune' mac ya'ay tu' xin, chak'cano nimanc'ulal Comam yiñ.

**16** Yuxin yilal heyallenati hemul teyet hununex, cat hetxahli yiñ ebnaj juxtaj yeb ebix janab tet Comam, cat heyañchacanoj. Yuto ebnaj c'ul yul sat Comam Dios, hayet chitxahli ebnaj yiñ sunil yanma, caw niman isyaxil ch'aycano yibañi yu Comam.

**17** Haca' naj Elías ischejab Comam Dios yet payat, anma naj haca' hañorñ ti', yaja' yiñ sunil yanma naj txahli naj tet Comam Dios yurñe mach chak' ha' ñab. Yuxin mach yak' ha' ñab yicta iscañ habil.

**18** Hato yet istxahlipaxo naj hunelxa yichipaxico yak'ni ñab. Hac tu' xin yak'ni sat tz'unub hunelxa.

**19** Hex wuxtaj, hex wanab, ta ay hunu mac texol chisheq'uilo isba yiñ Istzotí' Comam, apaxo xin hunujex chexoc tzotelo tet yiñ yet Comam, cat ismeltzoco yul isk'ab Comam hunelxa.

**20** Ohtañewecaniloj tato ha' hune' mac chinilo hunu naj mulum yiñ istx'ojal bay aycoj, lañian iscolchalo hune' mac mulum tu' yul isk'ab camical. Hac tu' xin tx'i'alpaxo ismul hune' mac tu' chitañcano yul sat Comam Dios.

**Nuevo Testamento yin abxubal  
New Testament in Jakalteko Eastern; jac  
(GT:jac:Jakalteko)**

copyright © 1997 Wycliffe Bible Translators, Inc.

Language: Jakalteko

Translation by: Wycliffe Bible Translators, Inc.

**Copyright Information**

© 1997, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Jakalteko

**© 1997, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
b5bce385-9ed7-5701-9edc-e221ef239a1c